

1297-1297- OFP - Acta Capitulum Generalium apud Venecias Celebrati

In nomine patris et filii et spiritus sancti. Amen.

Acta capituli generalis apud Venecias
celebrati anno Domini · M° · CC° · XCVII°

Confirmamus hanc constitutionem. In capitulo de ieiuniis. ubi dicitur. itinerantes autem bis refici possunt. nisi in adventu. addatur. et vigiliis nativitatis et purificationis beate virginis. Et hec habet · iii · capitula.

Approbamus has. In capitulo de domibus concedendis. in principio. omnes provincie ordinis nostri. exceptis · iiiior · scilicet. provincia Romana. regni Sicilie. Terre sancte. Grecie; dividantur in duas. Quam divisionem faciat magister ordinis vel eius vicarius cum diffinitoribus capituli generalis immediate sequentis. postquam hec approbatio fuerit confirmata. secundum modum tradendum a singulis provinciis. Quod si aliqua provincia vel provincie in modum divisionis non concordaverint; nichilominus magister ordinis vel eius vicarius cum diffinitoribus ad divisionem procedat. et divisiva nomina imponat. et de studio Parisiensi. et aliis studiis generalibus. studens unus subtrahatur. Et si quid in constitutionibus esset contrarium vel dissonum huiusmodi divisioni; magister ordinis vel eius vicarius et diffinitores capituli generalis corrigant vel immutent. Et hec habet · ii · capitula.

Item hanc. In capitulo de electione prioris conventualis. ubi dicitur. si vero mortuo priore vel amoto. post illud. aliter ordinaverit. addatur. quod si predicti tres non concordaverint. ad providendum sive de uno ipsorum trium sive de aliquo conventuali alio; duorum sententia prevalebit. Et hec habet · ii · capitula.

Item hanc. De s. Wenceslao martyre; fiat festum trium lectionum. in vigilia s. Michaelis. et annotetur in ordinario et calendario locis suis. et magister ordinis curet de officio providere. Et hec habet · ii · capitula.

Inchoamus has. In capitulo de domibus concedendis. ubi dicitur. mediocres domos. etc. deleatur totum quod sequitur usque ibi. nec fiant in domibus nostris curiositates etc.

Item hanc. In capitulo de electione prioris provincialis. ubi dicitur. quod si ordo magistrum non habuerit etc. deleatur totum quod sequitur usque ibi. provincialis prior eandem habeat potestatem. etc. et dicatur. quod si ordo magistrum non habeat. ad vicarium magistri ordinis; prioris provincialis confirmatio pertinebit.

Item hanc. In capitulo de electione magistri. ubi dicitur. exceptis absolucionibus priorum provincialium et conventualium aliarum provincialiarum. deleatur quod sequitur. et confirmacionibus priorum provincialium. quando de suis provinciis assumuntur.

Item hanc. De nativitate sancti Iohannis Baptiste. et de beatis apostolis Petro et Paulo. et de beata Maria Magdalena. fiat festum totum duplex; et magister ordinis curet de sequenciis¹ providere. et illud quod continetur in · vi · lectione de Magdalena. translatum est autem. etc. deleatur totum usque in finem.

Item hanc. De beato Nycholao fiat festum duplex.

Iste sunt declarationes.

Declaramus. quod in prima dominica adventus non licet fratribus lactiniis uti.

Item. Quod non licet fratribus ire ad superiores prelatos; nisi de licencia speciali.

Item. Ordinamus. quod libri et alie res decedencium fratrum qui resident in monasteriis sororum; pertineant ad provisionem prioris provincialis.

Iste sunt admoniciones.

Admonemus. quod cum ex ordinatione status nostri pacem ecclesie querere. fovere ac tueri pro viribus debeamus. districte precipimus fratribus universis in virtute obediencie. ne quis illis qui contra dominum nostrum summum pontificem dominum Bonifacium et sanctam Romanam ecclesiam se erexerunt; audeat occulte vel manifeste impendere consilium. auxilium. vel favorem. mandantes nichilominus et districte iniungentes. quod in predicacionibus publicis et alias. cum fuerit oportunitas. predicent. doceant et constanter asserant. dominum Bonifacium esse verum papam. successorem Petri; et vicarium Ihesu Christi¹.

Item. Monemus. volumus et ordinamus. quod secundum formam constitutionum predicacionis officium et audientia confessionum non committatur. nisi fratribus moribus et sciencia approbatis. de consilio discretorum. Fratres quoque. qui de suorum prelatorum licencia audiunt confessiones caveant diligenter; ne prelatibus causam turbacionis administrent.

Item. Ordinamus et volumus. quod priores absoluti et lectores vacantes. in questis. predicacionibus aliisque ministeriis; occupentur. nisi evidens ratio suadeat aliquando aliquibus esse parcendum. nec ipsi vel aliis quibuscumque sub pretextu consuetudinis et officii. esus carni concedatur. nisi tunc solum

¹ Inter principales adversarios Bonifacii VIII. numerantur Philippus, rex Francie, et Iacobus Colonna cardinalis eiusque familia, quae prima electionem Bonifacii seu potius cessionem Coelestini V. illegitimam esse asseruit.

quando debilitas id exposcit. Fratres quoque qui cum prelatibus vel cum principibus commorantur. honeste et religiose studeant conversari. et declinent sepius ad conventus. vitamque communem sectentur. seque in capitulis representent. ut accusari et corrigi valeant; prout fuerit opportunum.

Item. Iniungimus prioribus universis et eorum vicariis. quod circa regimen iuvenum curam adhibeant diligentem et arceant a discursibus et evagationibus. et occupentur in certis studiis lectionum. nec mittantur ad studium arcium. nisi prius in cantu et divino officio sint instructi; et nisi duos annos compleverint ab ingressu.

Item. Iniungimus districte prioribus et eorum loca tenentibus. quod fratribus infirmis de necessariis. ceterisque indigentibus. de vestibus diligenter studeant providere. et qui contrarium fecerint; per priores provinciales et visitatores acrius puniantur. et nichilominus per visitatores diffinitoribus generalis vel provincialis capituli deferantur.

Item. Volumus et ordinamus. quod nullus promoveatur ad sacerdotium; antequam sue etatis compleverit · xxv · annum.

Suffragia pro vivis

Ista sunt suffragia pro vivis.

Pro domino papa Bonifacio. etc.

Suffragia pro defunctis

Ista sunt suffragia pro defunctis.

Pro domino fratre P. de Murrone quondam papa Celestino. etc.².

Iste sunt penitencie.

Fratribus conventuum Bozanensis et Tridentini. qui non concordaverunt in socio faciendo; iniungimus · iii · dies in pane et aqua et · i · psalterium.

Item. Cuilibet fratri provincie Lombardie. qui prevenit tempus statutum intrandi locum capituli; iniungimus tres dies in pane et aqua.

Concedimus provincie regni Cicie · ii · domos. unam ponendam in Venusio. et aliam in terra nobilis viri comitis sancti Severini. ubi videbitur priori provinciali et diffinitoribus capituli provincialis.

Item provincie Theotonie; · ii · domos.

Absolvimus priores provinciales Hispanie. Romane provincie; et Grecie.

Absolvimus priores conventuales Ezinensem. etc. Et isti non assumantur in eisdem provinciis et conventibus ad eadem officia; isto anno.

Cum fratres nostri Mediolanenses pie ac ferventer desiderent. quod corpus gloriosum beati Petri martyris. apud eos humiliter debito repositum. ad eiusdem sancti gloriam et ad devocionem fidelium excitandam. honorabiliter et decencius recondatur. ob quam causam disposerunt sumptuosum opus ad hoc ydoneum construere quamtocius habuerint facultatem. mandamus et imponimus prioribus et fratribus universis. quod suos familiares et alias personas sibi notas efficaciter moneant et inducant. ut operi sic necessario et merito; manus porrigant adiutrices¹.

Committimus magistro ordinis ordinationem studii Parisiensis et aliorum studiorum generalium. ut ipse de magistris et bacallariis provideat. ordinet et disponat. prout utilitati ordinis et profectui viderit expedire.

Item. Volumus et iniungimus. quod diffinitores capituli generalis presentis et futuri anni. veniendo et redeundo deducantur de conventu ad conventum. et provideatur eis secundum morem ordinis; prout hactenus extitit observatum.

Sentencias iudicum approbamus.

Letania more solito dicatur. et post oracionem. ineffabilem. addatur. oracio. ecclesie tue domine preces. etc.

Sequens generale capitulum assignamus apud Methim in provincia Francie. et diffinitores veniant ad locum capituli; dominica infra octavas ascensionis. Nullus autem frater alius. eciam si licenciam habeat. locum capituli intret; ante · vi · feriam vigiliam penthecostes precedentem.

Actis additae sunt litterae magistri ordinis; cf. app. n. LI.

² Coelestinus V. (Petrus de Murrone monachus O.S.B., fundator congregationis cuiusdam O.S.B., quae ab ipso nomen Coelestinorum assumpsit), obiit in castro Fumonis 1296. Maii 19, postmodum inter sanctos relatus. EUBEL l.c. pag. 11.